



## Орган Лемковского Союза.

Выходит в каждый четверг.

Редакция и администрация в Крынице. — Адрес „Лемко” Крыница.

Всіх читателів, котры не вплатили ище пренумераты, просиме выровнати якнайскорше рахунки.

Ище єст на складі Календар „Лемка” на 1936-ый рок.

Ціна одного календара выносит **50 гр.** При замовленях 10 календарей оплату почтову платит редакция.

Пренумерата в краю:  
30 грошей місячно,  
80 „ квартално  
1.50 „ полрочно,  
3 зл. рочно.

В Америкі: 1 дол. рочно.

В Чехословакии:  
2 кор. місячно, 10 кор. полрочно,  
20 кор. рочно.

Ціны оголошень:  
Ціла сторона 120 зл., 1/2 сто-  
роны 60 зл., 1/4 стороны 35 зл.,  
1/8 стор. 20 зл., 1/16 стор. 10 зл.;  
оголошення малы за 1 мм. 20 гр.,  
в тексті 30 гр., перед текстом  
40 гр. При місячном и долшом  
оголошеню значна знижка.

Контото чекове Нр. 404.155.

## Комунизм и народна демо- кратия — дві группы анархии.

**Министер Рачкевич заявил без-  
взглядну борбу с бурителями.**

Дня 24. лютого перед начатем дебат над бюджетом Министерства Внутренних Діл, забрал голос п. министр Рачкевич и выголосил долшу промову на тему ладу и безопасности в державі. В промові той министр Рачкевич посвятил много часу и слов двом политычным группам, а именно комунистам и польской народной демократии, котру в скороченю называеме ендеками. О обох тых политычных группах высказал ся министр Рачкевич, яко о таких, котры сут розсадниками анархии и бурителями ладу, порядка и безопасности в державі.

Комунисты, сказал г-н Министер, приміняють тепер нову тактыку и старают ся приступати в члены ріжных товариств, опановати ріжны организации фаховы и общественны и том дорогом жите тых организаций затрути слином комунизма. Общество мусит выказати велику осторожность, бо комунизм єст рішительным врагом польской державности.

Переходячи до другой бурительской политычной группы т. зв. ендеков, то г-н Министер заявил, же тотта партия што раз больше своим нерозумном роботом замінят ся в партию бурительску. Тоты люди не ведут ниякой работы творческой, натоміст анархизуют общественне жите через подбуряне польского населеня против народным меньшенствам через тайне роздаване клеветничих летучок, писем и друков, подважающих авторитет выдающих ся личностей и державных достойников.

Г-н министр Рачкевич заявил при конці своей бесіды, же Правительство с полным рішительностью противоставит ся той кары-дстойной акции.

## Революта в Японии.

Премиер Окада, министры финансов и внут-  
ренних діл и адмирал флоты Саито убиты.

Во главі революционеров стоит завзятый  
враг Совітов, генерал Араки.

Дня 26. лютого т. р. о 5-ой год. 20 минут воякы першой дывизии убили адмирала Саито, премиера Окада, министра финансов, Такагаши и министра внутренних діл Гото.

Тота войскова революта выкликала величезне порушене в политычных кругах европейских держав. Револютом том занепокоены сут в першой мірі Совіты, бо во главі революты стоит их завзятый враг генер. Араки, бывший министр войны, творец великого пляну завоеваня Сыбири через Японию. Ген. Араки має по своей стороні цілый корпус офицеров, особенно молодых офицеров, котры сут ему отданы на смерть и жите. Молодой офицерский корпус под влиянем ген. Араки єст в цілости успособленный против Совітам и стремится до завоеваня на азийской суши не лем части Кытая, але также и части Сыбири. Корпус тот єст сторонником безотложного начатя войны с Совітами, чому супротивляли ся правительственны кругы. Тотто стало ся причином выбуху революты и убийства министров и адмирала, котры старали ся отдалити войну с Совітами.

Политычны кругы ріжных держав сут того мніня, же в случаю побіды революционеров не можна предвидіти, якы зміны наступили бы во внутренних отношениях Японии, але за то легко предсказати, як ишла бы их

политыка загранична. Тотта заняла бы агрессивне положене в виду всіх сусидов Японии, и выликкала бы опасность медженародных кризисов и неожиданно выбухающих воєн, котры угрожали бы не лем миру на Далеком Выході, але также и на цілом світі.

На разі революционеры окопали ся в Токио и сут окружены войсками, якы остали вірны правительству. Як розвяжут ся дальши события в Японии, довідаме ся скоро.

## Подумайме о прибли- жающих ся работах весняных.

Доброй газда выкористує свободный час в зимі, штобы призадумати ся над улучшенем своего господарства и приготовить ся належито до весняных работ.

Одном с важных справ, якы належит добре обдумати, єст справа отвітного навсження грунту. Подношено уж нераз, же в каждом господарстві передовсем мусят быти выкористаны власны навозовы средства, т. є. навозы господарскы, як оборник, компост и гнояница. До доброго и цілевого выкористаня тых навозовых средств мусит каждый газда привязати велику вагу и не марніти власного добра.

Справа навоженя єст так важна, же планый плод все потягат за собом втрату. Поднесенє продукции, котра не выстарчат часто на власны потреби, не бесідуючи уж о перезначеню хоц части той продукции (рослиной ци звірачой) на продаж, єст доконче потребне и без того жадне хозяйство не може ся удержати.

Штобы господарство не падало, мусит оно давати уроджай, если не добры, то по крайней мірі, середны и о такы уроджай

мусит ся старати каждый газда и если при помочи власных навозовых средств не має можности одержати добры плоды, то мусит он докупити навозы штучны, котры, приміняны розумно, дают знаны користи. Што однак треба розуміти под словом „розумно приміняны”? Отвіт короткий: треба дати рослинам тоты складники, котрых не має земля, а котры сут рослинам доконче потребны; давати тых складников потребне для рослины количество и навозити во властивой порі.

С того видиме, же не можна давати ту якыйси припис, котрый был бы добрый для каждой землі и для каждой рослины. Представме тоты річи на примірах: Сієме н. пр. овес по житі в третом, або четвертом році по гною. Овес буде планний, але ту и там будут купки гардого овса о великой рясі и грубом зерні. Чом? А бо там остал дробный гной с купок эле рострясены и овес нашом там ище досыть корма, особливо азотного.

#### На чом вырастат гардый овес.

Тоты купки гардо выросненого овса показуют нам, килько больше можна бы было мати овса, даючи под засів отвітну навозову допому. Если бы мы в таких случаях ужили якыси 100—150 кг. 21-процентного азотняка на 1 га., мали бы мы на цілом поли такый, а може ище гардший овес, як на тых купках. Користь с посіяня ту азотняка была бы велика.

#### Чого потребує пшеница.

Там засіяли мы пшеницу на выяловіой уж землі, тож заповідат ся слабо, або в незлых условиях пшеница со зимы выходит слабо, переріджена морозом. В одном и другом случаю трудно числити на добрый урожай. Але если в тых случаях подкріпиме землю салитром вапенном, або салитря-

ком, то плод пшеницы буде совсем добрый, може аж и двократно лучший, як без навозовой допому.

#### Якы навозы даєме под морков и бураки.

Найлучше платят за допому навозову бураки и морков. Под тоты рослины дає ся азот и потас. Бураки „подсалитрованы” роснут на очах. Листе аж ся фалдує, наберат темно-зелену фарбу и бураки вырастают величезны. До салитрованя бураков надає ся салитра ванпева.

#### В яры зерна,

в котры засіваме конич, даєме с добрым результатом супертomasыну азотнякову. Употребленный навоз не лем подносит плод зерна, але дійствує барз користо и на розвитє коничу, для котрого так фосфор, як и вапно сут доконче потребны складники.

#### Якых навозовых складников потребуют рослины.

Ріжны рослины потребуют ріжных кормовых складников. Одним рослинам потребный єст азот, другим фосфор, а иншим ище потас. Справы тоты обговориме точно в слідеючом сислі „Лемка”. Подаме в нем много приміров, якы выступають часто в малых господарствах рольных, тепер лем зазначаме, же сыпанє в днешных тяжких часах штучных навозов там, где можеме без них мати добры плоды было бы именно тым „неумілым приміненєм” штучных навозов и вышмарянем гроша.

Прото тыж тепер найлучша пора, штобы призадумати ся над тым, где и якы рослины будеме сіяти и якы навозы штучны купиме на місци, бо если их нїт, треба уж тепер зажадати, штобы спроваджено их на час, памятаючи о том, што каждый навоз має свои отрубны свойства и же ріжны навозы не могут ся взаимно заступати.

Навозы такы, до купна котрых намовит нас купец тому, бо их має на складі, не все сут отвітны для нашой землі и рослин и часто газда, даючи ся нагварити, може не мати таких плодов, на якы числил. Другыма словами — идучи до skleпу, мусиме згоры знати, якы навозы сут нам потребны.

Зазначити треба, же маме три группы навозов штучных, а именно: 1) навозы азотны, до котрых належат азотняк, вапнева салитра и салитряк, 2) навозы фосфоровы (супертomasына, tomasына звычайна и суперфосфат) и 3) навозы потасовы (кайнит, потасова соль и калимаг. Крім того сут навозы містячи в собі два рослины кормы, як н. пр. супертomasына азотнякова.

Всі навозы, котры належат до группы навозов азотных, містят в собі оден и тот самый складник т. є. азот, але ріжнят ся медже собом количеством азота, скоростью действия азота и впливом на почву.

Навозы фосфоровы містят в собі инший складник, а именно фосфор, а навозы потасовы—потас. Ріжны навозы фосфоровы містят в собі не одынакове количество фосфору, дійствуют не одынаково на почву и не одынаково легко сут доступны ростинам. Такы самы ріжницы сут и медже навозами потасовыма.

Тож жадного с тых кормов (азота, потаса и фосфора) не можна заступити другим, т. є. азота не можна заступити фосфором, ани потасом, ани фосфора ци потаса азотом.

Прото тыж справу купна штучных навозов треба уж завчасу добре розважити и обдумати, штобы закупити отвітны формом до нашого грунту и гатунком до управляных рослин, бо лем втотчас можеме надіяти ся доброй вроды и выданный грош зверне ся нам с процентом.

## Мысли о прошлом и теперешном.

Приходят на гадку літа давны — тому 40—50. роков. Понадобило ся Австрии сотворити украинску нацию. Відома річ, што треба было начати от школы и церкви. Со школом справа легка — дано приказ и одним замахом усунено етымольогию, введено фонетыку, а в школьных книжках начато величати лем Шевченка, Франка, Котляревского и др. На безхарактерных професоров, котры зразу примкнули до украинского табора, посыпали ся почести и авансы, на тых, котры стояли при своєй народности, посыпали ся доносы, переслідованя и кары. Многы укорили ся и хоц явно не отрекали ся своєй народной чести, то сїдили застрашены тише воды.

Тяжше, а на всякий случай помальше ишла справа с церквом. Загал священства руский, — епископы также рускы. Епископы именованы Римом, не подлежат державной власти. Треба выждати, аж вымрут, а тогда вліяти на Рим, штобы именовал для Австрии подходячих. Початок зроблений назначенєм Сильвестра Сембратовича. Тот перший начал вводити украинофильску политику в діла греко-русской униятской церкви в Галичині. Против єго злобных замыслов возставил загал священства, доказом чого сут рішеня галицкого церковного провинциального собора, котрый медже прочим одноголосно отшмарил проєкт целибата (безженства) наших священников.

Но Австрия справы не засыпляла а робила все пляномірно.

В р. 1889. офицер уланов, граф Андрей Шептыцкий в 24-ом році жия мінят нагло свой латинский обряд на греко-русский и начинат студи-вати теольогию.

Откаль то ся взяло, што человек, котрый до 24-ого року жия был поляком и выхованный был в латинском обряді так неожиданно почувствовал в собі сымпатии до греко-русского обряда и то так сильно, што оставил латинский обряд?

Вправді, украинскы газеты по случаю єго юбилея писали недавно, што тым способом хотіл он „направити” того, што предкы єго „вітчужили ся” от украинской церкви и народности, однак лучше поясненє того найдеме в том факті, што уж в р. 1899 адже по шестох літах священства именуєт єго еписко-

пом на перший опорожнивший ся епископский престол в Станиславові, а в р. 1901. отже в осмом році священства именуєт єго по смерти митрополита Д-ра Юлиана Куиловского митрополитом львовским, а епископом в Станиславові именуєт Григория Хомышина.

И пошла „украинизация” греко-кат. церкви в Галичині полном паром на всіх попрыщах, в духовных семинарах, в области обрядовой и области политики перзональной через усунанє из видных и отвітственных міст священников рускых и обсаджанє их украинцами.

Страшна буря світовой войны пронесла ся літом 1914. року понад нашими головами. Кто не мал марки „украинца”, был уж подозренный, яко враг Австрии, а кто не отрек ся своего прадідного руского народного имени, мал марку шпюна и державного зрадника.

Соткы-тысячи рускых галичан, селян, міщан, священников, урядников, одним словом, всіх сословий, діти и старцы пошли в Талергоф и Терезыну, гнаны кольбами и багнетами австрийских карабинов и каменями дикой толпы, або повисли на придорожных деревьях и столбах.

В Талергофі и Терезыні одны под голым небом, другы в стайнях и бараках на гнилой соломі гынули от холода, голода, тыфа и згрызоты. Погыбал квіт народа. И не было кому из своих упомнути и вставити ся за жертвами, бо кость от кости и кровь от крови нашой „украинскы” послы и достойники не лем не мыслили нас ратовати, но в вїденских министерияльных передпокоях кули на нас интрыгы и новы доносы, а князі церкви...?

Они также свою историчну мисию сполнили. Станиславовский князь церкви, Григорий, спасаючи свою цінну голову, оставил стадо своих овец (позабыл о словах Учителя: „душу свою полагаю за овцы моя”) и закопал ся аж в Стырию, ци Краину до якогоси німецкого монастыра и соттамаль слал до своих вірных посланя, штобы твердо держали ся католицкой церкви, а світочу „украинского” духовенства, графу Шептыцкому, припала участь отограти также ролю жертвы и народного „украинского” мученика. Ище тогда не предвиділо ся, што отнайдуєт ся мощи св. Йосафата (примічанє складача). (Продолженє в слід. числі).

**К о м у н и к а т.**

Воєводске Бюро до Діл Финансово-Рольных комуникує: Пан Министер Рольництва и Реформ Рольных в бесіді, выголошеной на с'їзді Центрального Товариства Організацій и Рольных Кружков в Варшаві дня 15. грудня 1935. р. порушил также справу отдолженя в слідуючих словах: „Не могу наконец поминути справу отдолженя. Польша не пошла на то, чтобы в большинстві случаев перечеркнути должны суммы, бо удержала вполні основу ненарушальности вкладов в институтиях, в котрых коплено ошадности. Прото тыж мусит быти належность банков и кас сплачена совсем. Можна было натоміст обнижити опроцентованє и розложити сплату на долги літа. Тото именно зроблено”.

С бесіды пана Министра видно ясно, же порушил лем справу отдолженя в институтиях финансовых, а не высказал ся совсем в спрвві отдолженя и приватных кредиторов. — Тож оголошенє в газеті „Новины” Ч. 1. с дня 12 січня 1936. р. в артыкулі под заглавиєм „Стараня и надїи сорганизованого хозяйства”, же „Правительство пошло на то, чтобы всі приватны долги перечеркнути” не отвічат правді, бо лем сплата приватных рольных долгов была приостановлена постановленєм артыкула 3. а, зарядж. През. Річи Посп. с дня 24.Х. 1934. оголошеного в цільном тексті обїжником Министра Финансов с дня 5. грудня 1935 р. Дн. 3. Р. П. Ч. 5. поз. 59. с року 1936., до дня 1. жолтня 1938. Проценты в высоті 300 рочно от приватных рольных долгов начинаючи от 1. листопада 1934. мают быти плачены в терминах полрочных здолу от 1. квітня 1935.

Тож долги приватны, если кредитор не выстарат ся в дорозі постановленя уряду роз'ємного на основі арт. 46. покликаного зарядженя През. Р. П. вчаснійшой сплаты своєї вірительности, будут платны в 28-ох ратах, начинаючи от 1. жолтня 1938 р.

**Важне для пасічников!**

Кто с пасічников хоче достати цукор для пчол, нехай сейчас зверне ся до г-на Осифа Яновицкого в Крыниці-Селі. Цукор выдає ся лем членам Повітового Союза Пасічников в количестві по 2 кг. на 1 пень. Членска вкладка выносит рочно 1 зл., вписове 50 гр. и на легитымацію 7 гр. разом 1'57 зл., котры то гроши належит заплатити при замовленю цукру. Цукор для пасік коштує 55 гр. за 1 кг., — платит ся при замовленю. Штобы достати цукор для пасік, треба принести удостовіренє с громадского уряду, стверджаюче сколькость посіданых пней. Треба звертати ся як найскорше!

**ЩАВНИК ПОВ. НОВОСАНДЕЦКОГО.**

Дня 23. лютого отбыло ся в Щавнику дорочне Обще собранє членов читавні им. М. Качковского. В собраню приняли участь кромі місцевого населеня также люды со Злоцкого, Ястрябика, Милика, Андреєвки, Поворозника и Крыницы. При переполненной читальняной салі председатель собраня М. Трохановский привитал собраних и высказал признательность членам читальні и правленю за положеный нима успішний труд. Щавник не маючи ни от кого помочи, зрозуміл потребу просвіщеня и науки и надал дальшой роботі добрый фундамент через выбудованє своєго чит. дома — очага науки и культурной работы. Погодивше

приступлено до вычерпання дневного порядка и по отчитаню протокола с собраня, доклада с діятельности и касового, уділено уступаючому правленю абсолюторию и высказано признательность так правленю, як и всім жертводателям и тым, котры помагали в роботі при будові читальняного дому.

По выборі нового правленя выголосила Емилия Яновицка прекрасный исторычный реферат, в котром на основі исторыков польских, як Длугош, Кромер, Бельский, а сновших Хылинский и Закржевский дальше—на основі назв сел и міст, як Королева Руска и др., а также на основі родовых назв як Русин, Русенко и др. выказала, же назва Украина и украинец не має своєго исторычного основаня. Реферат, выголошенный приступно и с юмором выкликал горячи рукоплесканя. — М. Трохановский пояснил собраним причины основаня и ціли Лемко-Союза и Осиф Яновицкий поздоровил собраних от им. О-ства им. М. Качковского и завоzwал до численного приступаня в члены читальні и до вытревалого культурно просвітительного труда.

По вычерпаню дневного порядка отспівал крыницкий хор ряд прекрасных пісней, нагороджених громкыма рукоплесканями и высвітлено картины с житя и страстей Исуса Христа. Ободрены и вдоволены вертали с собраня члены и долго ище чути было голоса коло читальняного дома.

Участник.

**СЕЛО ПАНТНА ГОРЛИЦКОГО ПОВ.**

От долшого часу село наше оставало под натиском компании украинских борителей под командом Асафата Гривны и Василя Павлика, котры, не маючи мудрійшого аргумента, палком, ножом и грозьбом старали ся ширити у нас украинску пропаганду.

И так в часі свят Рождества Христ. компания тота начала колядовати, збераючи жертвы на „Рідну Школу. Нарочно ходили по хыжах рускых газдов, членов читальні им. М. Качковского и не лем требовали жертв, але и провоковали, величаючи Украину и высміваючи всьо, што руске и так ся розвыдріли, што начали по дорозі бити и калічити всіх, котры не належали до пантнянской украинской компании.

Тяжко побили того вечера (9. січня) Козму Скрипака и Н. Гбура с с Гладышова, а также Василя Перуна и Михала Молчана, а слідуючого дня побили и ножами порізали Яцка Цьока.

Но дикым выступам розсобаченой банды спротивили ся розважнійши жителі села. Они звернули ся с жалобом до полиции и суда и головного пантнянского атамана, Асафата Гривну всадил суд до слідчого ареста, где он, Богу дяковати, дотепер сидит.

До часу дзбанок воду носит и лем до якогоси часу можна безкарно провоковати спокойных людей — бо всьому приде заслуженый конец.

Член читальні.

**ОКОНЧЕНЄ ДЫРЫГЕНТСКИХ КУРСОВ В КРЫНИЦІ.**

Старанєм Лемко-Союза устроєно в Крыниці 2-ох місячны курсы дырыгентов хоров, котры окончили ся дня 13-го лютого т. р. Курсы провадил и науки уділял г-н Александер Ропицкий знаныи музык и композитор. На тогорочном курсі учили ся начи-

наючи курсанты и курсанты, котры уж окончили в прошлом року курс низший. На жаль число курсантов в том року было мале (всього 4-ох на курсі низшом и 2-ох на курсі высшом), а шкода, бо спів и музыку любит страшно наш народ и співом можна притягнути до читальні неодного такого, котрого ничим иншим не притягне. Шкода и прото, бо не все буде оказизия устроити такой курс, бо не все будеме мати в Крыниці такого дырыгента и музыка. Результаты науки были чудны. Особенно оба курсанты высшого курса, Осиф Станко с Лабовы и Исидор Яценік с Мохначкы овладіли вполні материал и совсем свободно, — як то гварят, — на почеканю, гармонизуют пісні, дорабяючи до знаной нуты инши голосы. Так Осиф Станко, а особенно Исидор Яценік може провадити самостоятельно каждый читальняный и церковный хор.

Сут они и добры организаторы и тому, если бы котре село потребовало дырыгента хора, радиме звернути ся до высше названных.

**ЦІНЫ СВИЖОГО И КОПЧЕНОГО МЯСА В ПОВ. НОВОСАНДЕЦКОМ.**

На конференции отбытой в Старостві в Н. Санчі дня 24. лютого т. р. при участии представителей Цеху Колбасников и Цеху Різников усталено низше поданы ціны мяса, котры обвязуют от дня 27 II. 1936 р.

	в цілом повіті без Крыницы	в Крыниці-Здрю
Мясо волове	0'75 зл.	1'10 зл.
„ теляче передне	0'70 „	1'10 „
„ „ задне	0'90 „	1'20 „
„ вєпрове с 1000 докладком	1'10 „	1'30 „
Котлеты вєпровы	1'40 „	1'60 „
Шинка копчена	2'30 „	2'50 „
„ варена в цілости	2'70 „	2'90 „
„ краяна в плястры	3'20 „	3'40 „
Карчок вареный	2'50 „	2'70 „
Бочок копченый	1'50 „	1'70 „
„ вареный	1'90 „	2'10 „
Колбаса краяна	2'40 „	2'60 „
„ чисто вєпрова (сельска)	2'10 „	2'30 „
„ сікана звычайна	1'40 „	1'60 „
Солонина солена	1'70 „	1'90 „
„ свіжа	1'50 „	1'70 „
Болона чиста (сало)	1'90 „	2'10 „
Смалец	2'10 „	2'30 „
Мішанина звычайна	1'90 „	2'10 „
„ ліпша	2'40 „	3'10 „
Паштетова кышка	1'70 „	1'90 „
Сальцесон с головы	1'90 „	2'10 „
„ звычайный	1'40 „	1'60 „
Колбаскы	2'70 „	2'90 „
Сарделькы	1'90 „	2'10 „
Вєпровы кости	0'20 „	0'30 „
Кышкы кашаны	0'60 „	0'70 „
„ булчаны, печеневы и др.	0'80 „	0'90 „

ПОМІЩАЙТЕ  
**ОГОЛОШЕНЯ**  
В ГАЗЕТІ „ЛЕМКО”

## Што чути в світі.

**Негус** хоче повірити Лигі Народов на 12 літ адміністрацію Абисинії. Головном причиною того рішення має бути то, що цивілізаційним усилям негуса супротивляють ся коптійські священники і абисинські князі (раси) і негус єст пересвідчений, же лем одна Лига Народов могла бы перевести цивілізаційну акцію Абисинії.

**Асмара:** Ведля обчислення італіанского штаба в боях от 11-го до 17-го лютого італіанські самолеты шмарили на абисинців 25.700 бомб о вазі 178 тонн.

**Москва:** Совітська праса подає, же в маю т. р. має бути урухомлена воздушна комуникация Москва-Прага. Ленія летнича має ити понад територію румунску.

**Атени:** Король грецький, Юрий має наміренє повірити Венізелосу мисию утвореня нового кабинета. Политичні противники старают ся переконати короля, же поворот Венізелоса выкличе невдоволенє в войску и в силах морських. Положенє в Греции єст сильно напружене.

**Москва:** Совітська армия святковала в тих днях 18-ту рочницю свого существованя Торжества были получены с противлетничима вправами. Во всіх фабрыках на даный сигнал отозвали ся сырени и всі роботники одили ся в противгазны маски. Фабрычны комины начали вышмаряти незвычайно густы клубы дыму и в коротком часі не было видно фабрычной части Москвы и тым самым летчики не могли до фабрык цілити. Вечером отбыли ся забавы для вояков и офицеров. Воякы достали по фляшці водки. В Хабаровску перед маршалом Блихером передефильовало в часі парады 75 тысячей войска с чолгами и самоходами.

В Калькуті (Индии) ширит ся страшна епидемия оспы. В 15-ох днях померло 400 людей.

В Мексыку войско в числі 1000 людей попере чолгами и самолетами сточило формальный бой с 200 бандытами, котры мали наміренє напасти на місто Сиєра Набара. Войско побідило, але коштом 40-ох убитых и 100 раненых. Втраты бандытов выносили лем 17 людей. Бандыты мали машинны карабины, панцерны самоходы и 2 полевы арматы. Гершт банды Камарон отобрал собі житє.

Професор Шилинг голосит, же вынашол таинственны лучи розгриваючи, котры уможливають єму сідити голо на ледовой скалі при 15-ох градусах мороза и заідати морожене.

**Льондон:** Италия приступила до величезной програмы доолнення летничого вооруженя. Тепер каждого дня робит ся в Италии 12 новых самолетов. С концом того року Италия буде мати 5500 самолетов.

В Испании по выборах, котры принесли побіду лівым партиям, выбухли кырвавы розрухы во всіх великих містах.

**Страшный газ:** Віденські газеты подають вість, же німецькы хемикы вынашли незвы-

чайно сильный трукочий газ, котрый перевышат всі знаны до тепер. Газ єст без запаха, але дійствує скоро на тканкы человеческого тіла, поводуючи росклад. Звірята, подданы дійствию того газу, в кількох минутах заміняли ся в гниучу лепку масу. Убийственный газ предостає ся через всі охоронны фильтры. Тот вынаход оплачено смертьом 4-ох молодых ученых німецькых, котры затрули ся при выробі газу. Видно с того, же Німеччина кричит голосно о своих мирных наміренях, але по тихы приговлят ся до новой страшной войны.

## Вісти с краю.

**Варшава:** Ведля спису Варшава числила дня 1. січня 1936 р. 1,224.242 жителей без войска.

**Варшава:** По введеню амнистии заобсервовано, же число крадежей увеличило ся. Вязницы наполняют ся знова недавно освобожденными криминалистами. Так нпр. в Варшаві в мокотовской вязниці число арестантов єст уж таке, як было перед амнистием.

**Варшава:** В полиции введено ужитє револьверов скорострільных нового тыпа амерыканского и финского. В звязи с тым всі полициянты мусят перейти курс, на котром ознакомлят ся с новым оружием.

В Кельцах в часі верченя новой студні натрафлено случайно на богаты поклады чорного мрамору. Штобы можна добывати тот мрамур, треба рособрати стоячи на том місци войсковы кошары.

**Ясло:** В газном шибі в Глиничку коло Ясла пожар знищил цілу вертничу вежу.

В Рыхвалді дня 24 лютого т. р. на отбываючи ся весільну забаву в корчмі молодого Яна Гибаса хотіло ввойти кількох авантюриков, котрых весільны гості не впустили. Авантюриковы старали ся силом ввойти до середины и весільники завозвали полицию до помочи. На пришедшого коменданта и 2-ох полициянтов шмарили ся авантюристы с кыями и друками а также обшмарили их каменями. Во власной обороні полиция ужила оружие, убила одного авантюриста

(Яна Бєнка), и двоих инших (Антония Бєнка и Вл. Томичка) ранила в ноги. Решта напастников розбігла ся. Дом Гибаса єст сильно знищений.

**Бандыцький напад на солтыса:** До помешканя Григория Якымяка, солтыса села Глухов (пов. сілецкого) ктоси в ночи задуркал, подаючи ся за тайну полицию. Коли солтыс отккрыл двери, до сіней вышол якийси мужчина и по вынятю с кышені револьвера, приложил єго до головы Якымяка, приказуючи выдати собі гроши.

Бандыт забрал с шуфляд и куфров 500 зл. 120 серебряных рублей, 2 золоты гидинники. Пак приказал выдати собі 30.000 зл., котры мали быти гдеси схованы.

В том моменті на дорозі появило ся світло переїздяючого автомобиля. Бандыт, думаючи, же іде полиция, почал утекати. Полиция зловила єго в Сільцах. Єст то 23-літний Евген Модржевський.



В селі Злоцком пов. новосандецкого отбуде ся

в неділю, дня 8. марта 1936 о год. 2-гой по полудни в домі Луки Крайняка

### Обще Собранє

ЧЛЕНОВ ЧИТ. ИМ. М. КАЧКОВСКОГО, на котре дооколичну интеллигенцию и людей запрашат

Виділ читальні.

### Обще Собранє

ЧЛЕНОВ ЧИТ. ИМ. М. КАЧКОВСКОГО во Флорынкі отбуде ся дня 8. марта (в неділю) т. р. о год. 2-ой по полудни.

Порядок обрад:

- 1) Отккрытє собрания и выбор презыдии.
- 2) Отчитанє протокола с послідного собрания.
- 3) Доклад с переведеной ревизии и принятє рішень.
- 4) Доклад касовый и уділенє абсолютории уступаючому правленю.
- 5) Выбор нового правленя и контр. комисии.
- 6) Внесеня членов.

Всіх рускых людей с околицы просит приняти участь в собраню

Правленє.

КТО ХОЧЕ ЗАБЕЗПЕЧИТИ СЕБЕ НА СТАРОСТЬ И РОДИНУ  
ОТ НУЖДЫ И ГОЛОДА, АБО ЗЛОЖИТИ ДІТЯМ ВІНО,

НЕХАЙ ЯКНАЙСКОРШЕ

заасекурує ся

в асекураційном Товаристві

Вита и Краковске

во ЛЬВОВІ

Асекурацию принимают на цілой Лемковщині  
представителі: гг. Осиф Яновицький — Крыница-Село и Ми-  
хаил Перелом — Сянок.